

tačnim redosljedom koji je propisan tim Poglavljem. Prijava treba biti čvrsto uvezana, a sve strane prijave numerisane i ovjerene pečatom podnosioca prijave i potpisom ovlaštenog lica podnosioca prijave.

Napomena 3: Podnosiocu prijave ne mogu biti odobrena poticajna sredstva po Programu ako su podnosiocu prijave odobrena sredstva po istom osnovu putem drugih programa koje u 2024. godini provodi Ministarstvo privrede Kantona Sarajevo na osnovu Zakona o poticaju razvoja male privrede ("Službene novine Kantona Sarajevo", broj 29/15).

Napomena 4: Podnosilac prijave ima pravo podnijeti prijavu samo za jedan projekat iz Poglavlja V Programa.

Napomena 5: Ukoliko se naknadno utvrdi da su tvrdnje u izjavama podnosioca prijave iz ovog Poglavlja neistinite, kao i da je druga dokumentacija podnosioca prijave propisana ovim Poglavljem neistinita, prijava se neće uzeti u razmatranje, a ukoliko se ove činjenice utvrde nakon dodjele poticajnih sredstava, podnosilac prijave kojem budu dodijeljena sredstva dužan je izvršiti povrat ovih sredstava sa pripadajućim zakonskim zateznim kamatama.

XIII UGOVOR O REALIZACIJI ODOBRENIH SREDSTAVA

Nakon donošenja odluke o izboru korisnika sredstava, Ministarstvo privrede sa odabranim korisnicima sredstava zaključuje pojedinačne ugovore o realizaciji odobrenih sredstava. Ugovor obavezno sadrži: predmet ugovora, iznos odobrenih sredstava, namjenu i uslove dodjele odobrenih sredstava, rokove utroška sredstava, način i rokove izvještavanja o utrošku sredstava, nadzor nad utroškom sredstava, sankcije u slučaju nepoštivanja ugovora, kao i druge neophodne elemente ugovora po ocjeni Ministarstva privrede u cilju uspostavljanja jasnog obligacionog odnosa ugovornih strana. Obavezni sastavni dio ugovora je obrazac "Izvjestaj o realizaciji odobrenih sredstava". Prije zaključenja ugovora, odabrani korisnik sredstava obavezan je Ministarstvu privrede dostaviti bjanko ovjerenu mjenicu sa ovjerenom mjeničnom izjavom, a ova mjenica može se realizovati do visine iznosa odobrenih sredstava uvećanog za zakonske zatezne kamate i ugovornu kaznu ako je ugovorena.

XIV INFORMACIJA O REALIZACIJI ODOBRENIH SREDSTAVA

Na osnovu praćenja i evaluacije realizacije odobrenih sredstava po Programu, Ministarstvo privrede sačinjava Informaciju o realizaciji odobrenih sredstava za 2024. godinu. Informaciju Ministarstvo privrede dostavlja Vladi Kantona Sarajevo, najkasnije do 31.12.2025. godine.

Broj 02-04-44436-25.1/24
26. septembra 2024. godine
Sarajevo

Po ovlaštenju premijera
Ministar
Zlatko Mijatović, s. r.

Na osnovu člana 26. i 28. stav (2) Zakona o Vladi Kantona Sarajevo ("Službene novine Kantona Sarajevo", broj 36/14 - Novi prečišćeni tekst i 37/14 - Ispravka), člana 7. Zakona o ministarskim, vladinim i drugim imenovanjima Federacije Bosne i Hercegovine ("Službene novine Federacije BiH", broj 12/03, 34/03 i 65/13) i člana 107. stav (2) Zakona o odgoju i obrazovanju u osnovnoj i srednjoj školi u Kantonu Sarajevo ("Službene novine Kantona Sarajevo", broj 27/24), Vlada Kantona Sarajevo, na 41. sjednici održanoj 19.09.2024. godine, donijela je

ODLUKU

O STANDARDIMA I KRITERIJIMA ZA IMENOVANJE NA POZICIJE PREDSEDNIKA I ČLANOVA ŠKOLSKOG ODBORA OSNOVNE ŠKOLE, SREDNJE ŠKOLE, SREDNJOŠKOLSKOG I ŠKOLSKOG CENTRA KAO JAVNE USTANOVE NA PODRUČJU KANTONA SARAJEVO

I

(Predmet)

Ovom odlukom utvrđuju se standardi i kriteriji za imenovanje na pozicije predsjednika i članova školskog odbora osnovne škole, srednje škole, srednjoškolskog i školskog centra kao javne ustanove na području Kantona Sarajevo.

II

(Upotreba ženskog ili muškog roda)

Terminološko korištenje ženskog ili muškog roda u ovoj odluci podrazumijeva uključivanje oba roda.

III

(Sastav školskog odbora)

- (1) Školski odbor osnovne škole, srednje škole, srednjoškolskog i školskog centra kao javne ustanove broji četiri člana.
- (2) Predsjednika i članove školskog odbora osnovne škole, srednje škole, srednjoškolskog i školskog centra kao javne ustanove na području Kantona Sarajevo imenuje Vlada Kantona Sarajevo (u daljem tekstu: Vlada) od kandidata koji su se prijavili na javni oglas.
- (3) U školski odbor osnovne škole kao javne ustanove imenuju se:
 - a) predsjednik, predstavnik Ministarstva - na prijedlog Ministarstva za odgoj i obrazovanje Kantona Sarajevo (u daljem tekstu: Ministarstvo),
 - b) jedan član za predstavnika općine na čijem području se nalazi škola - na prijedlog općinskog organa,
 - c) jedan član za predstavnika roditelja/usvojitelja/staratelja (u daljem tekstu: roditelj) učenika škole i
 - d) jedan član za predstavnika radnika škole.
- (4) U školski odbor srednje škole, srednjoškolskog i školskog centra kao javne ustanove sa područja Grada Sarajeva imenuju se:
 - a) predsjednik, predstavnik Ministarstva - na prijedlog Ministarstva,
 - b) jedan član za predstavnika Grada Sarajeva - na prijedlog gradskog organa,
 - c) jedan član za predstavnika roditelja učenika škole i
 - d) jedan član za predstavnika radnika škole.
- (5) U školski odbor srednje škole, srednjoškolskog i školskog centra kao javne ustanove izvan područja Grada Sarajeva imenuju se:
 - a) predsjednik, predstavnik Ministarstva - na prijedlog Ministarstva,
 - b) jedan član za predstavnika općine na čijem području se nalazi škola - na prijedlog općinskog organa,
 - c) jedan član za predstavnika roditelja učenika škole i
 - d) jedan član za predstavnika radnika škole.
- (6) U školski odbor škole, srednjoškolskog i školskog centra kao javne ustanove koju je osnovala vjerska zajednica odnosno crkva samostalno ili sa drugim pravnim ili fizičkim licem imenuju se:

- a) predsjednik, predstavnik osnivača - na prijedlog osnivača,
- b) jedan član za predstavnika Ministarstva - na prijedlog Ministarstva,
- c) jedan član za predstavnika roditelja učenika škole i
- d) jedan član za predstavnika radnika škole.

IV

(Opći i posebni uvjeti)

- (1) Za predsjednika i člana školskog odbora osnovne škole, srednje škole, srednjoškolskog i školskog centra kao javne ustanove na području Kantona Sarajevo, može biti imenovan kandidat koji ispunjava sljedeće opće uvjete:
 - a) da je stariji od 18 godina,
 - b) da nije otpušten iz državne službe kao rezultat disciplinske mjere na bilo kojem nivou u Bosni i Hercegovini (bilo na nivou države ili entiteta) u periodu od tri godine od dana objavljivanja upražnjene pozicije,
 - c) da se na tog kandidata ne odnosi član IX. 1. Ustava Bosne i Hercegovine,
 - d) da nije osuđivan za krivično djelo nespojivo sa dužnošću u školskom odboru osnovne škole, srednje škole, srednjoškolskog i školskog centra,
 - e) da nije izabrani zvaničnik, nosilac izvršnih funkcija, savjetnik u smislu Zakona o sukobu interesa u organima vlasti u Federaciji Bosne i Hercegovine ("Službene novine Federacije BiH", broj 70/08) da nije nosilac javne funkcije u smislu Zakona o prevenciji i suzbijanju korupcije u Kantonu Sarajevo ("Službene novine Kantona Sarajevo", br. 35/22, 44/22-Ispravka i 52/22 - Ispravka), odnosno da nije lice koje je izabrano u organe predstavničke, zakonodavne, izvršne i sudske vlasti, niti lice koje ima smetnje za imenovanje u skladu sa zakonima kojima se regulišu pitanja sukoba interesa na svim nivoima vlasti,
 - f) da nije izabran u organe i tijela političkih partija,
 - g) da nije radnik Ministarstva,
 - h) da nije radnik Javne ustanove Institut za razvoj preduniverzitetskog obrazovanja Kantona Sarajevo,
 - i) da nije radnik općine na području Kantona Sarajevo i radnik Grada Sarajeva.

- (2) Pored općih uvjeta iz stava (1) ove tačke, kandidat koji se imenuje na poziciju predsjednika i člana školskog odbora osnovne škole, srednje škole, srednjoškolskog i školskog centra kao javne ustanove na području Kantona Sarajevo obavezno ispunjava i posebne uvjete kako slijedi:

- a) za predsjednika i člana - predstavnika Ministarstva, općine ili Grada Sarajeva:
 - 1) da ima najmanje VII stepen stručne spreme ili prvi ciklus studija po bolonjskom procesu,
 - 2) da ima najmanje pet godina radnog staža u struci,
 - 3) da nema privatni finansijski interes u školi u čiji školski odbor se kandidira,
 - 4) da nije direktor škole registrirane u Kantonu Sarajevo,
 - 5) da nije radnik škole u čiji se školski odbor kandidira,
 - 6) da nije roditelj učenika koji pohađa školu u čiji se školski odbor kandidira;

- b) za člana školskog odbora - predstavnika radnika:
 - 1) da ima završen najmanje VII stepen stručne spreme ili prvi ciklus studija po bolonjskom procesu,
 - 2) da ima najmanje pet godina radnog staža u struci,
 - 3) da nije direktor škole registrirane u Kantonu Sarajevo,
 - 4) da nije roditelj učenika koji pohađa školu u čiji se školski odbor kandidira,
 - 5) da ima status radnika u školi kao javnoj ustanovi u smislu važećih propisa o radu;
- c) za člana školskog odbora - predstavnika roditelja:
 - 1) da ima završen najmanje IV stepen stručne spreme,
 - 2) da nije direktor škole registrirane u Kantonu Sarajevo,
 - 3) da nije radnik škole u čiji se školski odbor kandidira,
 - 4) da ima status roditelja učenika škole u čiji se školski odbor kandidira.

V

(Javni oglas)

- (1) Na osnovu općih uvjeta utvrđenih u članu 7. stav (1) Zakona o ministarskim, vladinim i drugim imenovanjima Federacije Bosne i Hercegovine ("Službene novine Federacije BiH", br. 12/03, 34/03 i 65/13) i standarda i kriterija iz tačke IV ove odluke, ministrica za odgoj i obrazovanje Kantona Sarajevo (u daljem tekstu: Ministrica) raspisuje javni oglas za imenovanje na pozicije predsjednika i članova školskog odbora osnovne škole, srednje škole, srednjoškolskog i školskog centra kao javne ustanove na području Kantona Sarajevo.
- (2) Javni oglas iz stava (1) ove tačke objavljuje se u "Službenim novinama Federacije BiH" i najmanje jednom dnevnom listu velikog tiraža, na zvaničnoj internet stranici Vlade, Ministarstva i škole u kojoj se vrši imenovanje na pozicije predsjednika i članova školskog odbora.
- (3) Škola iz stava (1) ove tačke je obavezna tekst javnog oglasa istovremeno objaviti i na vidnom mjestu u školi, kako bi sa sadržajem teksta javnog oglasa bili upoznati svi zainteresirani kandidati.

VI

(Komisija za izbor)

- (1) Komisiju za izbor predsjednika i članova školskog odbora osnovne škole, srednje škole, srednjoškolskog i školskog centra kao javne ustanove na području Kantona Sarajevo (u daljem tekstu: Komisija) rješenjem imenuje Vlada na prijedlog Ministrice.
- (2) Rješenjem Vlade o imenovanju Komisije iz stava (1) ove tačke bliže će se urediti radni zadaci Komisije.
- (3) Komisija iz stava (1) ove tačke je zadužena za pregledanje i utvrđivanje formalno-pravne urednosti pristiglih prijava na javni oglas (blagovremenost i potpunost), za provođenje intervjua sa kandidatima koji budu ispunjavali formalne uslove objavljenog javnog oglasa, za sačivanje rang-liste kandidata čije su prijave ocijenjene formalno-pravno urednim, te za provođenje drugih radnji za koje bude zadužena rješenjem Vlade o imenovanju.

VII

(Zabrana diskriminacije)

Prilikom utvrđivanja ili primjene standarda, Vlada neće vršiti diskriminaciju prema bilo kome na osnovu rase, nacionalnog ili etničkog porijekla, boje, vjere, pola, bračnog statusa, porodičnog statusa, invalidnosti ili zbog postojanja osude za koju je izrečeno pomilovanje.

VIII

(Evidencija)

Standardi i kriteriji za imenovanje na pozicije predsjednika i članova školskog odbora osnovne škole, srednje škole, srednjoškolskog i školskog centra kao javne ustanove na području Kantona Sarajevo, čuvaju se u evidenciji Vlade.

IX

(Prestanak važenja ranijeg propisa)

Danom stupanja na snagu ove odluke, prestaju da važe Odluka o standardima i kriterijima za nominovanje/imenovanje na pozicije predsjednika i članova školskih odbora osnovnih škola kao javnih ustanova, čija konačna imenovanja vrši Vlada Kantona Sarajevo ("Službene novine Kantona Sarajevo", broj 33/17, 23/22 i 14/23) i Odluka o standardima i kriterijima za nominovanje/imenovanje na pozicije predsjednika i članova školskih odbora srednjih škola kao javnih ustanova, čija konačna imenovanja vrši Vlada Kantona Sarajevo ("Službene novine Kantona Sarajevo", broj 41/17, 23/22 i 14/23).

X

(Stupanje na snagu)

Ova odluka stupa na snagu narednog dana od dana objavljivanja u "Službenim novinama Kantona Sarajevo".

Broj 02-04-42562-26/24

19. septembra 2024. godine

Sarajevo

Premijer

Nihad Uk, s. r.

Na osnovu člana 26. i 28. stav (2) Zakona o Vladi Kantona Sarajevo ("Službene novine Kantona Sarajevo", broj 36/14 - Novi prečišćeni tekst i 37/14 - Ispravka) i člana 6. Uredbe o dodjeli transfera neprofitnim organizacijama i pojedincima iz Budžeta Kantona Sarajevo ("Službene novine Kantona Sarajevo", broj 22/21, 13/22 i 21/24), a u vezi sa članom 3. stav (1) tačka c), j) i n) Zakona o odgoju i obrazovanju u osnovnoj i srednjoj školi u Kantonu Sarajevo ("Službene novine Kantona Sarajevo", broj 27/24), Vlada Kantona Sarajevo, na 41. sjednici održanoj 19.09.2024. godine, donijela je

ODLUKU**O DAVANJU SAGLASNOSTI MINISTRICI ZA ODGOJ I
OBRAZOVANJE KANTONA SARAJEVO DA
ZAKLJUČI UGOVOR O DODJELI SREDSTAVA ZA
FINANSIRANJE TROŠKOVA PUTOVANJA
PREDSTAVNIKA BOSNE I HERCEGOVINE NA
EVROPSKU JUNIORSKU OLIMPIJADU**

I

Daje se saglasnost ministrici za odgoj i obrazovanje Kantona Sarajevo da zaključi ugovor o dodjeli sredstava, u iznosu od 3.300,00 KM (slovima: tri hiljade tri stototine i 00/100 konvertibilnih maraka), iz Budžeta Kantona Sarajevo Udruženju "Informatičke olimpijade u Bosni i Hercegovini" za finansiranje troškova putovanja dva takmičara i jednog voditelja ekipe sa područja Kantona Sarajevo, koji predstavljaju Bosnu i Hercegovinu na Evropskoj juniorskoj olimpijadi iz informatike u gradu Kišnjevu (Moldavija).

II

Za realizaciju ove odluke zadužuju se Ministarstvo za odgoj i obrazovanje Kantona Sarajevo, Ministarstvo finansija Kantona Sarajevo i Udruženje "Informatičke olimpijade u Bosni i Hercegovini", svako u okviru svoje nadležnosti.

III

Ova odluka stupa na snagu danom donošenja, a objavit će se u "Službenim novinama Kantona Sarajevo".

Broj 02-04-42562-27/24

19. septembra 2024. godine

Sarajevo

Premijer

Nihad Uk, s. r.

Na osnovu člana 26. i 28. stav (2) Zakona o Vladi Kantona Sarajevo ("Službene novine Kantona Sarajevo", broj 36/14 - Novi prečišćeni tekst i 37/14 - Ispravka) i člana 6. Uredbe o dodjeli transfera neprofitnim organizacijama i pojedincima iz Budžeta Kantona Sarajevo ("Službene novine Kantona Sarajevo", broj 22/21, 13/22 i 21/24), a u vezi sa članom 3. stav (1) tačka c), j) i n) Zakona o odgoju i obrazovanju u osnovnoj i srednjoj školi u Kantonu Sarajevo ("Službene novine Kantona Sarajevo", broj 27/24), Vlada Kantona Sarajevo, na 41. sjednici održanoj 19.09.2024. godine, donijela je

ODLUKU**O DAVANJU SAGLASNOSTI MINISTRICI ZA ODGOJ I
OBRAZOVANJE KANTONA SARAJEVO DA
ZAKLJUČI UGOVOR O DODJELI SREDSTAVA ZA
FINANSIRANJE TROŠKOVA PUTOVANJA
PREDSTAVNIKA BOSNE I HERCEGOVINE NA
INTERNACIONALNU JUNIORSKU OLIMPIJADU IZ
INFORMATIKE**

I

Daje se saglasnost ministrici za odgoj i obrazovanje Kantona Sarajevo da zaključi ugovor o dodjeli sredstava, u iznosu od 5.800,00 KM (slovima: pet hiljada osam stotina i 00/100 konvertibilnih maraka), iz Budžeta Kantona Sarajevo Udruženju "Informatičke olimpijade u Bosni i Hercegovini" za finansiranje troškova putovanja četiri takmičara i dva voditelja ekipe sa područja Kantona Sarajevo, koji predstavljaju Bosnu i Hercegovinu na Internacionalnoj olimpijadi iz informatike u gradu Aleksandrija (Egipat).

II

Za realizaciju ove odluke zadužuju se Ministarstvo za odgoj i obrazovanje Kantona Sarajevo, Ministarstvo finansija Kantona Sarajevo i Udruženje "Informatičke olimpijade u Bosni i Hercegovini", svako u okviru svoje nadležnosti.

III

Ova odluka stupa na snagu danom donošenja, a objavit će se u "Službenim novinama Kantona Sarajevo".

Broj 02-04-42562-28/24

19. septembra 2024. godine

Sarajevo

Premijer

Nihad Uk, s. r.

Na osnovu člana 26. i 28. stav (2) Zakona o Vladi Kantona Sarajevo ("Službene novine Kantona Sarajevo", broj 36/14 - Novi prečišćeni tekst i 37/14 - Ispravka) i člana 6. Uredbe o dodjeli transfera neprofitnim organizacijama i pojedincima iz Budžeta Kantona Sarajevo ("Službene novine Kantona Sarajevo", broj 22/21, 13/22 i 21/24), a u vezi sa članom 3. stav (1) tač. c), j) i n) Zakona o odgoju i obrazovanju u osnovnoj i srednjoj školi u